

001695

南

京

文

獻

吳白之

時年八十有三

第四號

民國三十六年四月

陳沂

金陵古今圖考

陳作霖

鳳麓小志

盧前

冶城話舊


南京市通志館印行



吳越楚地圖





圖三



秦并後縣圖






















金陵古今圖考序

予家三世居南都。雖歷覽京闕之勝。徵考前代。乙亥歲。京尹以府志屬筆。紬繹舊史。博洽羣記。參攷考索。乃有得焉。因卽所知。復私創爲圖。凡十有六。金陵在禹貢揚州之域。雲陽遐邇。不能片縷。自越滅吳。楚滅越。始有城邑。作吳越楚地圖。始皇兼并六國。析置郡縣。作秦秣陵縣圖。元屬吳郡。屬。作漢丹陽郡圖。孫權據有江東。作孫吳都建鄴圖。瑯琊渡江再興。典午文物浸盛。作東晉都建康圖。宋齊梁陳。相繼立國。作南朝都建康圖。隋唐滅國都。改易州邑。作隋蔣州圖。唐數變置。至季世始定。作唐昇州圖。楊徐竊據。李氏遂有江南。作南唐江甯府圖。宋并天下爲昇國建炎。南渡改置留都。作宋建康府圖。蒙古入據。開省置路。作元集慶路圖。聖祖肇造夏區。定鼎應天。大我都邑。功德維新。作國朝都城圖。應天領縣。括有南北。作府境方括圖。山形左盤右踞。古稱帝宅。作境內諸山圖。水經代有分合。支脈靡定。作境內諸水圖。城郭規制。隨世異態。不復可辨。作歷代互見圖。因圖附考。以備觀覽。若夫本朝之詳。則有京城圖志在焉。正德丙子春正月望鄞陳沂書。

吳越楚地圖考

金陵在春秋時。本吳地。未有城邑。惟石頭東有（冶城）。傳云。夫差冶鑄於此。卽今朝天宮地。去府東南一百二十里。當溧水溧陽之間。有（固城）。云古（瀨渚縣）。亦吳所築。周景王四年。楚靈王敗吳軍。陷固城。吳移瀨渚。於溧陽南十里。周迴七里。爲（陵平縣）。又敗於楚。更名（平陵縣）。後閻閭將伍員破楚。燒固城遂廢。元王四年。越勾踐用范蠡謀滅吳。將圖楚。稱伯江淮。乃築（城）於金陵長千里。以疆威勢。城周二里八十步。在今聚寶門外長千里。俗呼越臺。卽其址。金陵有城邑。自此始也。顯王三十六年。楚威王滅越。盡有吳故地。乃擅江海之利。因山立號。置（金陵邑）於石頭。後之石頭城據此。今石城門北岡壘削絕。皆城故區。

秦秣陵縣圖考（附圖一）

秦始皇二十五年。滅楚。并天下。分三十六郡。置守。尉。監。以金陵地屬（鄣郡）。改金陵邑爲（秣陵縣）。三十七年。東遊會稽。過吳。從江乘浦渡置（江乘縣）。皆統於鄣。又以望氣者之言。鑿鍾阜。斷長隴。以泄王氣。水自方山西比。巨流環繞。至石頭。達于江。後人名曰秦淮。考之鄣郡。不詳治所。志云。在石頭城地。史載吳興郡西。金陵本吳興西境也。秣陵云在城東南六十里秣陵浦處。今秣陵鎮卽其地。江乘按建康志云。在城西北十七里。南徐州記云。在縣西二里。有浦。發源于石頭。東入大江。因以爲名。又按吳徐盛作疑城。自石頭至江乘。當在石頭之東北。幕府之西南也。建康志圖。載江乘於琅玕東。恐非。

漢丹陽郡圖考（附圖二）

漢滅秦。以江南地封楚王韓信。荆王劉賈。吳王劉濞。皆大國。元符二年改（鄣郡）爲（丹陽郡）。屬揚州。統縣十七。秣陵。湖熟。永平。江乘。句容。溧陽隸焉。皆鄣郡舊址。東漢移郡治宛陵。至建安十三年。孫權領丹陽郡。自宛陵還治秣陵。改秣陵爲（建鄣郡）。在淮水之南。按吳苑記。去長樂橋東一里。南臨大路。長樂橋。今武定橋。東南有長樂巷。蓋自東城角之內外皆是。郡治城周一頃。開東南北三門。漢（揚州）無定治。或治壽春。或治曲阿。或治歷陽。治建鄣爲多。亦在淮水之南。去丹陽城東南二里。建鄣。卽秣陵舊治。湖熟在今東南六十里。淮水之北。有湖熟鎮。永平在今溧陽南十五里。溧陽在今溧水之固城。江乘。仍秦之治。句容。卽今治也。

孫吳郡建鄣圖考（附圖三）

初東漢末。以（秣陵）地封孫策爲吳侯。至弟權據有江東。築石頭。改秣陵爲（建鄣）。建安十三年。移（丹陽郡）治建鄣。黃龍元年。遂徙爲都。都城在淮水北五里。據覆舟山下。東環平岡以爲安。西城

石頭以爲重。後帶玄武湖以爲險。前擁秦淮以爲阻。周迴二十里十九步。詳見後考。赤烏十年。作太初宮。周迴五百丈。作八門。前五門。曰公車。曰昇賢。曰明陽。曰左掖。曰右掖。東一門。曰蒼龍。西一門。曰白虎。後一門曰玄武。都城之正門曰宣陽。又南五里至淮水。有大航門。時都城皆設籬。曰（古籬門）。宮之後有苑城。晉所謂（臺城）卽此。今西十八衛以南。玄津橋大街以北皆是。赤烏四年。東鑿渠名（青溪）。自城北塹。洩玄武湖水。九曲西南入秦淮。西鑿（運瀆）水。自倉城東入今內橋。與青溪合。南由今乾道橋。至斗門橋。達於秦淮。又夾淮立柵。謂之（柵塘）。金陵建都。自吳以始。東晉都建康圖考（附圖四）

晉武帝平吳。徙揚州治建業。在冶城之東。丹陽郡仍舊治。統縣永世江乘湖熟丹陽句容溧陽。改建鄴仍爲秣陵。後又徙秣陵於宮城南八里一百步小長干巷內。分淮水北之地。復置建鄴治。在宣陽門內。以丹陽西置江甯。元帝渡江。避愍帝諱。故建業爲建康。遂爲都。號東晉。以宰相領揚州牧。築城於青溪東南。臨淮水上。名東府城。別舊治爲西州城。以丹陽守爲尹。於江乘南置琅邪郡。領臨沂。卽丘。陽都。懷德四縣。以處從帝之渡江者。琅邪在今句容之琅邪鄉。臨沂在今上元之長甯鄉。卽丘陽都在臨沂之境。懷德在今上元之鍾山鄉。又僑置淮南。魏廣川。高陽。堂邑。南東海。南東平。南蘭陵八郡。並寄京邑宮城。仍吳之舊。成帝作新宮。繕苑城。修六門。宮城正南曰大司馬門。北昌平門。東西二門。曰東掖。西掖。大司馬門。與都城宣陽門對。又南出至淮水。上置朱雀門。南吳之大航門也。都城十二門。南北各四。東西各二。詳見於圖。淮水上設浮航二十有四。朱雀航。卽朱雀門處。在今鎮淮橋東。後移至橋處。蓋據淮爲阻。有事撤航爲備。卽吳柵塘之意也。成帝時。徙建康縣於御街西。

南朝都建康圖考（附圖五）

東晉既亡。宋齊梁陳。相繼爲據。宮城都城。皆仍於晉。號京臺。神臬初。劉裕逼晉主宮於秣陵縣。後

乃自卽管宮。元嘉二年。於臺城東。西開萬春千秋二門。都城十二門。南面次西曰宣陽。次東改開陽曰津陽。最東曰清明。最西改陵陽曰廣陽。北面次西曰玄武。次東曰廣莫。最西曰大夏。最東曰延熹。正東面曰建春。次南曰東陽。正西面曰西明。次南曰闔闔。宣陽爲正門。與宮大司馬門直對。津陽與宮南掖對。建春西明二門。達於宮前之直街者。宋於朱雀門之南。度淮五里。又立國門。在長干東南。以示觀望。齊皆因之。梁置石闕於端門外。改朱雀門稍西。在今鎮淮橋北。侯景攻臺城。燒大司馬門。陳復營治。改宮萬春門爲雲龍。改千秋門爲神武。改都城廣莫門爲北捷。揚州治丹陽郡。治皆仍舊。宋省懷德卽丘陽都三縣。盡入臨沂省。永平縣入溧陽。梁武生於秣陵同夏里。因以其地置同夏縣。在今上元之長樂鄉。陳以琅邪三郡地。置建興郡。領建安。同夏。烏山。江乘。臨沂。湖熟六縣。丹陽。江甯。建康。秣陵。句容。溧陽。仍隸丹陽郡。

隋蔣州圖考（附圖五）

隋文帝開皇九年平陳。建康城邑宮闕。并蕩耕墾。六朝之迹。不復有存者。廢（丹陽郡）。平其城以爲田。乃於石頭置（蔣州）。依漢置太守。以司隸刺史相統。析溧陽丹陽之地。置（溧水縣）。十八年。廢（丹陽）并入溧水。與（江甯）（當塗）三縣。屬蔣州。大業初。改蔣州。復名（溧陽郡）省。建康秣陵同夏三縣入江甯。又廢臨沂丹陽湖熟三縣。亦入江甯。與溧水二縣。仍爲丹陽郡所統。初揚州治徙蔣州城內。廢東府城。後末年以江都爲揚州。置總管府。句容屬焉。自後揚州之名。專於江都矣。

唐昇州圖考（附圖六）

唐滅隋。分天下十道。丹陽郡屬江南東道。武德二年。置行臺尚書省。三年。改江甯縣爲歸化縣。又改爲金陵縣。又析其地爲安業縣。尋廢。以句容縣置茅州。析江甯溧水之地。復置溧陽縣。七年。罷行臺爲大都督府。復蔣州。仍改茅州爲句容縣。與金陵溧水溧陽屬口州。九年。徙金陵縣於白下村。曰白下。

縣。貞觀七年。復改爲歸化。九年。仍爲江甯。至德二載。析置江甯郡。而縣廢。乾元元年。改郡爲昇州。上元二年。廢州爲上元。縣治在西州城地。光啓中。遷鳳臺山之西。大順元年。復置昇州。統上元句容溧陽溧水四縣。按吳苑記。隋大業六年。置金陵城。在玄風觀南園。又按唐李孝恭破賊。築唐府城。近石頭。天復二年。僞吳楊行密克昇州將徐溫。改築金陵城。貫秦淮。卽以州治爲府。以府治爲宮。恐南唐宮。卽昇州治所也。

南唐江甯府圖考（附圖七）

初僞吳楊行密子溥。在唐末取昇州。後將徐溫自領昇州。改築城郭。爲金陵府。至石晉天福元年。爲吳天祚二年。溫假子知誥篡吳。以金陵爲西都。改金陵府爲江甯府。遂以府治爲宮。以城爲都。國號唐。復姓李。更名昇城。周二十五里。北六都都城近。南貫秦淮于城中。西據石頭。卽今石城之山二門。南接長干。卽今聚寶門東。門以白下橋爲限。卽今大中橋。北門以玄武橋爲限。卽今北門橋。橋所跨。水皆昔所鑿城濠也。今通濟三山水關。卽當時淮水出入處。青溪九曲。至是爲築城絕其流。今竹橋下水西入舊城濠者。乃自潮溝從西南流之故道。自舊內傍南流。經淮清橋合秦淮者。則城內所存之一曲。內橋之北。東盡昇平橋。西盡大市橋。北至小虹橋。此宮城之限。內橋南直抵聚寶門大街。卽當時御街也。按志宮前御街。傍夾大溝。雜植槐柳。臺省相望。今溝猶存。江甯府治。改於宮城之東。割上元南十九鄉與當塗。北二鄉復置江甯。與上元二縣。皆治郭下。江甯治在北門內。上元治仍唐舊。句容溧水溧陽。亦仍舊治焉。

宋建康府圖考（附圖八）

宋開寶八年。南唐滅復昇州。仍以宮爲州治。隸江南東路。天禧二年。陞江甯府建康軍節度使。封壽春郡王爲昇王。建國後卽位。是爲仁宗。以昇爲大國。不以封諸皇子。其守臣皆以宰執近臣爲之。徙上元

縣于城東北。南唐司會府地。建炎三年。改江甯府爲建康府。又徙上元於城東隅。紹興三年。高宗駐蹕。明年徙府治於東錦繡坊。今舊內處。以府治地爲行宮。設留守。命守臣兼之。安撫制置。總領。轉運提領。御前馬步軍諸司。皆治于此。行宮。卽南唐宮地前。內橋改名天津橋。其下水引青溪。由東虹橋。今昇平橋。周繞大內東西北三隅。經西虹橋。今大橋。復合青溪。曰（護龍河）。城皆僞吳順義中所築。由尊賢坊。今里仁出東門。由鎮淮橋出南門。今聚由武衛橋出西門。城門。今石由清化坊出北門。今北門橋由斗門橋出龍光門。今三山門。以上元江甯爲赤縣。句容溧水溧陽爲畿縣。比西京故事。

元集慶路圖考（附圖九）

元至元十二年。卽建康府治門省。設建康宣撫司。江東建康道提刑按察司。又設江東道宣慰司。江淮等處行中書省。行樞密院。十四年。更立（建康路）總管府。以宣慰兼本路。達魯花赤。就僉廳君子堂內署府事。十六年。徙治於西錦繡坊大軍庫內。今府治處隸宣慰司。以達江浙行省。按察司改肅政廉訪司。因避行臺。遷治甯國路。府治遷徙不常。嘗於上元縣與軍器庫內置治。元貞二年。又徙府於銀行街東。南佳麗樓地。今江甯縣治。大德四年。徙於龍翔寺基。今武學處。後終於銀行街。天歷二年。以路爲潛邸。改名集慶城。中置錄事司。管治城內。徙江甯縣於南門外越臺側。陞溧水溧陽爲州。領三縣二州一司。比京畿例。與陝西奉天路。徑隸行御史。臺城仍宋舊呼。西門曰大西。龍光門曰水西。

國朝都城圖考（附圖十）

聖祖滅胡。區正中夏。於元至正丙申三月。取集慶路。戊申混一海內。改路爲應天府。大建城闕。考諸都城之域。惟南門大西水西。三門因舊。更名聚寶石城三山。自舊東門處。截濠爲城。沿淮水北崇禮鄉地。開拓八里。增建南出者二門。曰（通濟）、（正陽）。自正陽以東而北。建東出者一門。曰（朝陽）。

。自鍾山之麓曰龍廣山。圍繞而西。抵覆舟山。建北門。曰太平。又西據覆舟雞鳴山。即雞籠山緣湖水以北。至直濱山而西八里。又建北出者二門。曰神策。金川。自金川北。繞獅子山。即盧龍山於內。雉堞東西相向。亦建二門。曰鍾阜。儀鳳。自儀鳳迤邐而南。建定淮清涼二門。以接舊西門。而周門西出者五。由聚寶北。至金川神策。比通濟正陽。至太平之南北倍之。由朝陽至石城三山。比定淮至神策之東城。三山水門。至通濟水門之東西亦倍之。東盡鍾山之南岡。北據山控湖。西阻石頭。南臨聚寶。貫秦淮於內外。橫縮屈曲。計周九十六里。外郭西北。據山帶江。東南亘山控野。闢十有六門。東五曰姚坊。仙鶴。麒麟。滄波。高橋。南六。曰上方。夾岡。鳳臺。馴象。大安德。小安德。西一。曰江東。北三。曰佛甯。上元。觀音。周一百八十里。皇城居極東偏。正門曰洪武。與都城正陽直對。在宋元都城之外。燕雀湖地。西安門以北。宮牆即古都城之故址。東出青溪橋處也。舊內在古御街東。宋建康府元行臺地。郊壇在正陽門外東隅。洪武門北之左。列吏戶禮兵工五部。吏部之北。有宗人府。宗人府之後。有翰林院。詹事府。太醫院。洪武門北之右。刑中左右前後五軍都督府。後府之南。有太常寺。府之後有通政司。錦衣衛。欽天監。通政司之北。有鴻臚寺行人司。置刑部都察院大理寺於太平門外。築堤于玄武湖上。北達治所。光祿寺。尚寶司六科。在皇城內。國子監在雞鳴覆舟二山之南古藥園壘處。三十六衛環布於城中。五城兵馬指揮司。在城內者三。城外者二。南有坊以居民。北有營以設行伍衛。各有倉。什九在城西北。徙應天府治在舊內西華門之右。古西錦繡坊大軍庫元建康路處。徙上元縣於昇平橋右。宋行宮之東南。徙江甯縣治于銀作坊。元集慶路治。府學在武定橋東北。臨秦淮。即元路學地也。正統間。定都于順天府。以應天府爲南京設守備廳。如古留臺。

應天府境方括圖考

應天自有郡以來。疆地統括。盈縮不常。莫廣於漢。莫狹於隋。至唐以後屬縣。乃定皆在大江之南。國

朝始括江北二縣。弘治四年。析溧水十四區民。增置高淳。所領凡八縣。一曰上元。城東北境也。古江乘臨沂湖熟故地。二曰江甯。城西南境也。古秣陵建鄴丹陽故地。三曰句容。在上元之東八十里。出周郎橋。四曰溧水。在江甯之南九十里。出烏剎橋古瀨渚縣地。五曰溧陽。在溧水之東南五十里。出分界山古固城之東境。六曰高淳。在溧水西南。以高淳鎮置治。七曰江浦。在江甯之西。距大江古烏江地。增割鄰境爲縣。置治於贛口。八曰六合。在江浦之東。出浦子口。東盡句容之境。抵鎮江之丹陽丹徒。南盡溧陽溧水之境。抵廣德州。連甯國之宣城。盡東南之境。連常州之宜興。西南盡高淳江甯之境。抵太平之當塗。西盡江浦之境。抵和州。西北連滁州。北盡六合之境。連鳳陽之天長。東北盡句容六合之境。抵揚州之儀徵。東西相距三百六十里。南北相距四百六十里。

境內諸山圖考

唐志稱東南名山。衡廬茅蔣。金陵有二焉。蔣山故名鍾山。實都邑之鎮。武侯可謂鍾山龍盤是也。宋周應合山川序云。鍾山之左。自攝山臨沂雒亭衡陽。以達於東。又東爲白山大城雲穴武岡。以達于東南。又南爲土山張山青龍石晚天印彭城鴈門竹堂。以達于南。又南爲聚寶城家梓桐紫巖夏侯天闕。以達于西南。綿亘至三山。而止於大江。所謂龍蟠之勢也。鍾山之右。近之爲覆舟雞籠。在宮城之後。又北爲直瀆。大壯觀四望。以達于西北。又西北爲幙府廬龍馬鞍。以達于西。是爲石頭城。亦止于江。所謂虎踞之形也。然考其山之遠近。地之連脈。亦少有不合者。蓋東南之山。關城重抱。山勢連屬。不可一一次序言之。且古之江水。自三山東入。沿陰山石子岡。北流以至于石頭。又自石頭沿馬鞍四望廬龍幕府東折。至於觀音。又由臨沂攝山。直抵京口。二百餘里。山勢不絕。浮江而觀之。三山據于西南。石頭據爲西北。秦淮中出。乃天限之門戶也。今江水西流。沙洲曠邈。馬鞍鳳臺。爲民居日削。而陰山則陶冶爲澤。漸不可尋矣。此則圖其口口之大者焉。